

Pendatang tidak hargai layanan: PM

BH 17 JUN 2000

Oleh Kadir Dikoh

CYBERJAYA, Jumaat—Datuk Seri Dr Mahathir Mohamad hari ini menafikan bahawa Malaysia melanggar hak asasi manusia terhadap pendatang Filipina di Sabah dan kesal dengan tuduhan kononnya kerajaan tidak memberi layanan baik kepada rakyat asing di negara ini.

Perdana Menteri berkata, sebenarnya Malaysia memberi layanan yang baik dan membuka negara ini dengan memberi tempat tinggal kepada mereka tetapi usaha itu tidak di hargai.

Sebaliknya, kata Dr Mahathir, Malaysia pula kini berhadapan dengan masalah rakyatnya diculik, yang disifatkannya sebagai satu ugutan kepada negara ini.

"Kita tak buat apa-apa pun. Kita bagi tempat kepada orang, tetapi kita dapat balasan yang kurang baik. Kita

berhadapan dengan masalah orang kita diulik. Ini merupakan sebagai satu ugutan terhadap kita," katanya kepada pemberita selepas melancarkan Pusat Perisian Motorola di sini.

Beliau merujuk kes penculikan 21 orang termasuk semihilan rakyat Malaysia oleh kumpulan bersenjata pada 23 April di Pulau Sipadan, dan kini ditahan di pulau Jolo di selatan Filipina.

Dr Mahathir berkata demikian ketika ditanya sama ada Malaysia akan memperketatkan kawalan di pintu masuk bagi menyekat kemasukan pendatang tanpa izin Filipina ke Sabah.

Kini, lebih 500,000 rakyat Filipina di Sabah. Sebelum ini, kumpulan penculik itu dilaporkan mendesak ditubuhkan Suruhanjaya Sabah bagi menyiasat apa yang di-

dakwa berlaku pelanggaran hak asasi manusia terhadap bangsa Moro di Sabah.

Ditanya mengenai langkah-langkah wajar yang akan diambil bagi menangani masalah yang dibangkitkan itu, Dr Mahathir berkata perkara itu akan difikirkan dulu.

Mengenai dakwaan Panglima Tentera Nasional Indonesia (TNI), Laksamana Widodo AS bahawa Malaysia mengalihkan batu sempadan di daerah Lundu, Sarawak dekat sempadan Kalimantan, Dr Mahathir berkata, kerajaan tidak terbabit sama sekali.

Katanya, jika benar batu sempadan itu dialihkan ia mungkin dilakukan oleh orang yang tidak bertanggungjawab.

"Kita akan siasat, siapa yang alih... kita tidak tahu, kita kena periksa sebelum kita terima dakwaan sesiapa," katanya.